

REVISTA SITUASAUN – FEVEREIRU 2016

ASUNTU NE'EBÉ PRESIZA TAU ATENSAUN

- ▶ **Insidente Violénsia Asaltu Fíziku ho Uza Rama Ambon husi Ema Deskoñesidu Sai Manas (Trend) iha Munisipiu Dili Durante Fulan Feveiruru;**
- ▶ **Asalta Malu entre Eis Grupu Arte Marsial (GAM) Mosu Fila Fali no Sai Preokupasaun Komunitade, ne'ebé Rejista Insidente 9 husi Total Insidente 112;**
- ▶ **Insidente Violénsia Envolve Estudante Sa'e Maka'as no Barak mak Akontese iha Munisipiu Baukau;**
- ▶ **Insidente Violénsia Aumenta iha Munisipiu Manatutu no Konsidera Sériu.**

INSIDENTE VIOLÉNSIA ASALTU FÍZIKU HO UZA RAMA AMBON HUSI EMA DESKOÑESIDU SAI MANAS (TREND) IHA MUNISIPIU DILI DURANTE FULAN FEVEREIRU

Belun ho nia Sistema Atensaun no Responde Sedu (AtReS) iha Feveiruru 2016 rekolla insidente violénsia hamutuk 112. Husi número ne'e insidente 10 envolve ema deskoñesidu, ne'ebé insidente 7 akontese iha Dili ne'ebé ema deskoñesidu uza rama Ambon hodi asalta ema seluk. Número ne'e hanesan ho número iha Maiu 2015 maibé insidente iha Feveiruru ne'e halo ema pániku, labele la'o no la livre iha kalan no ta'uk atu tuur iha uma oin ka varanda tanba tarjetu husi asaltu rama ambo ne'e la klaru.

Husi insidente violénsia asalta ho rama Ambon 7 ne'ebé mosu iha Dili, insidente 4 akontese bainhira ema tuur hela iha varanda mak ema deskoñesidu mai hodi halo asalta. Insidente 4 ne'e ida-idak akontese iha Bebonuk Aldeia Metin IV, iha Fomento I Comoro, iha Aldeia Beheda Santa Cruz no Aldeia São Jose Ai-Mutin. Enkuantu insidente 3 seluk akontese bainhira ema la'o hela iha estrada mak ema deskoñesidu asalta sira ho rama Ambon. Insidente sira ne'e akontese iha Suku Bairru-Pite iha Aldeia Teki-Teki, Aldeia Fraket no Aldeia Ramelau. Hanesan kronolojia, insidente ida akontese iha loraon 15 Feveiruru 2016 maizumenu tuku 07.30 kalan iha Aldeia Metin 04, Suku Comoro, bainhira família sira tuur hela iha varanda, iha motor ida mai no para iha uma oin. Família ne'e hanoin iha ema ruma mak ba vizita sira, maibé derrepente ema ida ho rama Ambon hana sira no kona Joven ida. Insidente ne'e rezulta joven ne'e kanek iha kabaas no lori kedas ba HNGV.

Totál Insidente Violénsia iha Feveiruru 2016	
Munisipiu	Insidente
Aileu	6
Ainaru	5
Baukau	10
Bobonaru	5
Covalima	3
Dili	32
Ermera	10
Lautein	2
Likisá	9
Manatutu	10
Manufahi	6
Oekusi	3
Vikeké	11
Totál	112

ASALTU MALU ENTRE EIS GRUPU ARTE MARSIAL (GAM) MOSU FILA FALI NO SAI PREOKUPASAUN KOMUNITADE, NE'EBÉ REJISTA INSIDENTE 9 HUSI TOTAL INSIDENTE 112

Bazeia ba rezultadu monitorizasaun Sistema AtReS hatudu katak, número insidente ho karakterístiku grupu asaltu malu husi eis grupu arte marsial sira mosu fila fali no sai número aas liu iha fulan ida ne'e (insidente 9 husi total insidente 112) kompara ho fulan hirak liu ba ho average (rata-rata) insidente 3.2 kada fulan.

Iha insidente 2 mak akontese iha Likisá, ne'ebé eis GAM sira hein malu iha estrada no merkadu depois taa malu no tuda malu. Insidente grave liu mak akontese iha Aldeia Faulara, Suku Leotela, Likisá iha loraon 13 Feveiruru, tuku 01.00 meiodia. Eis grupu arte marsial sira hein malu iha merkadu no sira mai kedas ho sasán kro'at. Iha akontesimentu ne'e rezulta joven ida mate tanba taa ho katana iha nia kotuk laran, ida hetan kanek todan no ida kanek kmaan. Iha akontesimentu ne'e sunu mós Uma 10 no estraga hand tractor 1. Polisia mak halo intervensaun hodi kaer joven na'in 4 no sira seluk halai tiha.

Alende Likisá, insidente violénsia liga ba eis GAM mós akontese iha Dili hamutuk insidente 4. Insidente hirak ne'e liga ho problema pasadu ne'ebé sira hetan malu iha dalan, taa malu no tuda malu. Insidente mós akontese tanba eis GAM ida ba provoka fali ida seluk. Kazu ida ne'ebé konsidera grave liu mak akontese iha Aldeia Ramelau, Suku Bairru-Pite iha loraon 26 Feveiruru, tuku 03.00 lokraik, ne'ebé joven ida ho baliu taa joven ida seluk iha ulun, kabas no liman to'o hetan kanek todan. Insidente 3 seluk liga ba GAM mós akontese iha Baukau, ne'ebé komesa ho diskute malu kona-ba fatin para karreta hodi provoka no asalta malu.

INSIDENTE VIOLÉNSIA ENVOLVE ESTUDANTE SA'E MAKA'AS NO BARAK AKONTESE IHA MUNISIPIU BAUKAU





Iha Feveiruru, Sistema AtReS mós rekolla insidente violénsia liga ba estudante ne'ebé sa'e maka'as iha Munisipiu Baukau. Husi total insidente 112, iha insidente 10 mak envolve estudante no insidente 3 akontese iha Baukau. Número ne'e konsidera aas tanba kompara fulan sira kotuk ho average (rata-rata) insidente 7.1 kada fulan, maske iha Outubru 2015 número ne'e sa'e to'o 12. Hanesan kronolojia insidente iha loraon 22 Feveiruru, tuku 01.00 meiodia, estudante husi Eskola Pre-Sekundária Públiku No. 03 Villa Nova Baukau baku malu no tuda malu ho estudante husi Eskola Sekundária Públiku No. 02 ne'ebé rezulta estudante 1 kanek todan no lori ba Ospital Baukau. Ne'e hanesan kontinuasaun husi insidente ne'ebé akontese ona iha loraon 12 no 19 Feveiruru.

Insidente 2 seluk akontese iha Ossu, Vikeké ne'ebé estudante sira baku malu iha eskola tanba namora no to'o ikus envolve fali membru família. Insidente hanesan akontese iha Fatisi - Aileu insidente 1, iha Suai insidente 1. Iha Oekusi akontese insidente 1, ne'ebé estudante feto ida hetan isin-rua husi estudante mane ida hodi hamosu violénsia entre família sira. Enkuantu iha Lautein akontese violénsia entre estudante tanba tolok malu, iha Manufahi estudante sira baku malu tanba goza malu no iha Ermera estudante feto ida tarata mane kazadu ida tanba hafuhu estudante feto ne'e bainhira ba sentina.


INSIDENTE VIOLÉNSIA AUMENTA IHA MUNISIPIU MANATUTU NO KONSIDERA SÉRIU

Iha fulan Fevereiru, monitorizasaun Sistema AtReS hatudu insidente violénsia hamutuk 10 husi total 112 mak akontese iha Munisipiu Manatutu no númeru ne'e konsidera sa'e maka'as no sériu liu. Durante tinan rua ikus, iha Manatutu rejista insidente ho average (rata-rata) insidente 3.4 kada fulan de'it, maibé iha Fevereiru sa'e ba insidente 10. Karakterístika importante husi insidente ne'ebé akontese iha Manatutu mak dun malu buan ne'ebé iha insidente 5. Insidente sériu liu mak akontese iha loron 5 Fevereiru, iha tuku 02.00 dadeer madrugada iha Aldeia Carlilo, Suku Aiteas, Postu Administrativa Manatutu ne'ebé lain taa mate ferik-oan no oan-feto ida, inklui taa kanek oan mane na'in rua, tanba deskonfia ferik-oan dun lain kaer ai-moruk aat (buan). Família no viziñu besik ne'ebé haree lain nia atitude ne'e, entaun sira mós fila oho nia.

Insidente 5 seluk ne'ebé akontese iha Manatutu iha Fevereiru mak, 2 mosu iha fatin halo konstrusaun irrigasaun Laleia-Vemasse, 1 liga ho adulteriu, 1 liga ba disputa rai no 1 seluk taa malu entre oan ho aman hakiak tanba lanu.




See Mak Hahu / Halo Violénsia?




Ema Ne'ebe Hahu Violénsia Nia Jeneru saida?




Vitima Nia Jeneru Saida?




Hun no Abut Konfliktu



See Mak Responde?





ATIVIDADE PREVENSAN NO RESPONDE BA KONFLITU

Atividade Ne'ebé Hala'o Husi Ekipa Sistema Atensaun no Responde Sedu (AtReS)

- ▶ Rede Prevensaun no Responde Konfliktu (RPRK) ne'ebé estabesele husi ONG Belun ho Komunitade iha Postu Administrativa Lospalos, Munisípiu Lautein, realiza eventu Tara Bandu ida atu minimiza konfliktu entre komunitade iha Suku Fuiloro no entre suku viziñu sira. Serimónia kulturál ne'ebé hala'o iha loraon 25 Feveireiru 2016 ne'e komesa ho Mini Seminar hodi husu no hatán relata ba abut konfliktu iha Fuiloro, ritual dame malu entre komunitade Motolori-Asalainu no juramentu kulturál ba komunitade aldeia 9 iha Suku Fuiloro;



- ▶ Iha loraon 26 Feveireiru 2016, iha Kuartél Jerál PNTL Caicoli, ekipa Belun no representante Fundasaun Mahein halo enkontru ho Estrutura Alto Komandu Jerál PNTL. Prezensa PNTL mak Komisáriu Polísia Júlio da Costa Hornay – Komandante Jerál, Komisáriu Faustino da Costa, Segundu Komandante Jerál, Komisáriu Mateus Fernandes - Komandante Operasionál no Assessor ba Komandante Jerál, Major Felisberto Portugés Contente. Enkontru ne'e atu hametin kooperasaun iha futuro.



- ▶ Ekipa Belun halo sorumutu ida ho Sekretária g7+ hodi fahe informasaun kona-ba servisu ne'ebé durante ne'e parte rua halo, no mós atu reforsa parseria entre organizasaun rua no konkorda atu servisu hamutuk iha futuro. Iha parte seluk mós Belun liu husi Sistema AtReS fahe informasaun jerál iha rai laran liu-liu liga ba insidente violénsia no mudansa situasaun seguransa. Sorumutu ne'e hala'o iha Eskritóriu g7+ iha Ministériu Finansas iha loraon 19 Feveireiru 2016.



Atividade Ne'ebé Hala'o Husi Ekipa Mediasaun no Rezolusaun ba Disputa Rai (MRDR)

- ▶ Kontinua implementa mediasaun ba disputa rai abandonadu iha loraon 18 Feveireiru, Iha Suku Tirilolo Baukau. Partisipante mak hanesan mediator mai husi ekipa DTPSC Baukau, mediator husi Belun no disputante sira. Rezultadu laiha tanba DTPSC konsidera rai ne'e pretense rai estadu tuir lei rai no 01/2003.

Atividade Ne'ebé Hala'o Husi Ekipa Programa Apoiu Polisiamentu Komunitária (PAPK)

- ▶ Atu dezenvolve modelu polisiamentu komunitária ne'ebé sustentável ba longu prazu iha Timor-Leste, mak Belun ho parseiru Fundasaun Ázia hala'o enkontru ida iha loraon 10 Feveireiru 2016, iha Salaun Enkontru TAF. Enkontru ne'e ko'alia kona-ba estratéjia atu mak transfere responsabilidade ba lidera atividade polisiamentu komunitária husi parseiru Fundasaun Ázia no organizasaun Belun ba iha PNTL no lideransa lokál, halo koordenaun ba estrutura polisiamentu komunitária ne'ebé integradu.

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konfliktu husi koleasaun dados monitorizasaun liuhosi Sistema Atensaun no Responde Sedu (AtReS), kobre iha postu administrativu 43, husi postu 65, suku 208 iha Timor-Leste durante Feveireiru 2016. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agrade se no simu informasaun seluk ne'ebé bele klarifika ka update dados ne'ebé ami iha, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurenius Lein, Espesialista Prevensaun Konfliktu & Polítika: laurenius.belun@gmail.com